

**INATSISARTUT  
OMBUDSMANDIATA  
UKIUMOORTUMIK  
NALUNAARUTAA  
2006**

## **5. Suliat nalinginnaasumik soqutiginaatillit, inatsiseqartitsiffiusunut agguataakkat**

### **11.01-11-09 Nammingersornerullutik Oqartussat**

#### **09. Allat, pisortanit ikorsiissutit**

- Piffissaq Isumaginninnermi Naammagittaalliuuteqartarfiup suliamik suliariinninnerminut atugaa pillugu naammagittaalliuutit**

*A Ombudsmandimut saaffiginnippoq piffissaq Isumaginninnermi Naammagittaalliuuteqartarfiup naammagittaalliuummik suliariinninnerminut manna tikillugu atugaa naammagittaalliuutiginarlugu.*

*Ombudsmandi isumaqarpoq piffissaq Isumaginninnermi Naammagittaalliuuteqartarfiup suliamik suliariinninnerminut atugaa isorisariaqartorujussusoq, oqaatigalugulu suliap suliarineqarnerata sivilsuloorunneqarnera tamatumunngalu pissutaasoq Naammagittaalliuuteqartarfiup A-mut ilisimatitsissutigisimasaqaraluarraa.*

*Aammattaaq K Kommunip Isumaginninnermi Naammagittaalliuuteqartarfiup aalajangiinera unioqquillugu A-mit pisassarisat Naammagittaalliuuteqartarfiup pisassarisatut isiginngisaanik akiliisitsiniaannarneranik paasissutissiisummut Isumaginninnermi Naammagittaalliuuteqartarfiup qisuararsimannginera Ombudsmandip isornartorsiorpaa. (J.nr. 11.05.09.03/057-04)*

K Kommuni 26. november 2002-mi aalajangiivoq A Danmarkimut a ngalanermut pisortanit ikorsiissutinik ikiorserneqassasoq, ikorsiissutit utertillugit akilerneqarnissaat piumasaqaatigalugu.

Aalajangiinerup tassunga tunngasortaa A-p Isumaginninnermi Naammagittaalliuuteqartarfimmut naammagittaalliuutigaa.

A-p allakkatigut saaffiginnissutaat 24. juni 2004-mi tiguara, A-lu piffissaq Isumaginninnermi Naammagittaalliuuteqartarfiup suliamik suliariinninnerminut atugaa naammagittaalliuutiginiarpaa.

Isumaginninnermi Naammagittaalliuuteqartarfik 30. september 2004-mi qinnuigaara naammagittaalliuut pillugu oqaaseqaateqaqqullugu. Isumaginninnermi Naammagittaalliuuteqartarfik tamatumunnga atatillugu qinnuigaara suliami iliuuserineqarsimasut ulluisa allattorsimaffiat nassiueteqqlugu, naammagittaalliorpup suliami iliuuserineqarsimasut pillugit qanoq annertutigisumik ilisimatinneqartarsimanera ilanngullugu nalunaarlugu.

Isumaginninnermi Naammagittaalliuuteqartarfik uannut 5. oktober 2004-mi imatut allappoq:

"Isumaginninnermi Naammagittaalliuuteqartarfik suliaq pillugu 16. april 2004-mi aalajangiivoq. Aalajangiinerup assilinera ilangullugu nassiuunneqarput. Imaas-sinnaavoq aalajangiineq A-p tigusimanngikkaa, aalajangiinerli taanna Naammagitaalliuuteqartarfip allakkerisarfikkortumik utertutut (tamannami najugaqarfik pis-sutsilluunniit allat allanngorsimatillugit nalinginnaasumik pisarmat) tigusimanngi-la.

Naammagittaalliuuteqartarfip aalajangiineri ataatsimiinnerup kingornatigut sa-paatit akunnerisa 1-3-t qaangiunneranni nalinginnaasumik nassiuunneqartarpot, tas-sami aalajangiinerit atsiorneqannginnerini siulittaasumit misissorneqartussaam-mata, kiisalu nutserneqarneri il.il. utaqqineqartarlutik, kisianni piffissaq sivisuneru-soq ingerlasinnaasarpoq. Taamaattumik imaassinnaavoq aalajangiineq nassiuun-neqartoq aamma A-p Ombudsmundimut allagai imminnut paarlasmiasut.

Suliamit erserpoq A kommunip pisassarisaanik naafferartumik suli akilersuisoq, naak kommuuni 2004-mi martsimi aalajangiialuartoq pisassarisat akilerneqarnissaat piumasagaataajunnaartoq, naallu Naammagittaalliuuteqartarfik allatut aalajangiis-i-magaluartoq, taannalu kommunimut nalunaarutigineqarsimagaluartoq. A aalajangiinerup imarisaanik aamma nalornisoorsimasorinarpooq. Aalajangiinerup nassuiarne-qarnissaa kissaatigiguniuk A Naammagittaalliuuteqartarfimmut saaffiginninnissa-minut tikilluaqquneqarpoq." (Atorfefqarfimmi nutsigaavoq)

Isumaginninnermi Naammagittaalliuuteqartarfip aalajangiineranit makku erserput:

"Aappavit napparsimaneranut atatillugu Danmarkimut angalanermut pisortanit ikioriissutigineqarsimasut utertillugit akileqquneqarnissaannik K Kommunip aala-jangiinera 26. november 2002-meersoq pillugu naammagittaalliuutit Isumaginnin-nermut Naammagittaalliuuteqartarfip 16. april 2004-mi suliaraa, imatullu

#### AALAJANGIILLUNI

Kommunip aalajangiinera pisortanit ikioriissutit pillugit Inatsisartut peqqussu-taanni nr. 10-mi, 1. november 1982-imeersumi, kingusinnerusukkut allannguuteqar-tinneqartarsimasumi § 10, imm. 1, nr. 4 tunngavigalugu atorunnaarsinneqarpoq. Aa-lajangersagaq qulaani taaneqartoq imaattunik oqasertaqarpoq:

"§ 10. Ammattaaq isumaginninnermut ataatsimiititaq ikioriissutaasimasunik utertitsinissamik aalajangiisinnaavoq:

- 1) ...
- 2) ...
- 3) ...
- 4) Ikiorserneqarnissamik qinnuteqarnerup nalaani paasinarsereersimappat inuup pineqartup ikioriissutit piffissap sivikitsup ingerlanerani utertissinnaalissagai."

Naammagittaalliuuteqartarfik isumaqarpoq billet-imut ikiorserneqarnissannik aa-lajangiinerup nalaani pissutsinik ikioriissutigineqartut 29.335 kr.-t missarluinnaasa piffissap sivikitsup ingerlanerani utertillugit akiliisinnaasimaninnik takussutaasin-naasunik peqanngitsoq.

Naammagittaalliuuteqartarfik ammattaaq isumaqarpoq ikioriissutit akiliis-in-naassuseqarneq naapertorlugu akileqqunissaannut kommuuni pisinnaatitaasimanngit-soq. Naammagittaalliuuteqartarfik isumaqarpoq pisortanit ikioriissutit pillugit Inat-sisartut peqqussutaanni nr. 10-mi, 1. november 1982-imeersumi kingusinnerusukkut

allannguuteqartinneqarsimasumi § 10, imm. 1, nr. 4 tunngavigalugu utertitassanganngortillugit ikorsiineq taamaallaat pisinnaasoq ikorsiissutisisoq piffissap sivikitsup ingerlanerani utertsilluni akiliisinnaappat, tassalu Naammagittaalliuuteqartarfiup naliliinera malillugu sivisunerpaaamik qaammatit pingasut qaangiunneranni.

Taamaattumik aningaasat akileqquneqartut kommunimut akilissanngilatit." Atorfefarfimmi nutsigaavoq)

Allakkakka 29. september 2004-meersut eqqarsaatigalugit Isumaginninnermi Naammagittaalliuuteqartarfik akissuteqaqqullugu 5. januar 2005-imi nukingisaarpala. Isumaginninnermi Naammagittaalliuuteqartarfimmum tamatumunnga peqatigitillugu imatut allappunga:

"Isumaginninnermi Naammagittaalliuuteqartarfiup allagai 8. oktober 2004-mi ti-  
guakka, taakkunanngalu erseroq Naammagittaalliuuteqartarfik sulami 16. april  
2004-mi aalajangiisimasoq.

Naammagittaalliuuteqartarfimmum allakkani 29. november 2004-meersuni qinnu-  
tigaara sulami iliuuseqarnerit ullulorsorneqarnerisa allattorsimaffiat nassiuteqqullu-  
gu.

Sulami iliuuserineqartut ullulorsorneqarnerisa allattorsimaffiat qulaani taaneqar-  
toq suli tigunnginnakku suliaq eqqaasitsissutigaara.

Malugaara Isumaginninnermi Naammagittaalliuuteqartarfiup allakkani 8. okto-  
ber 2004-meersuni oqaatigigaa suliamit ersetq A Kommunip pisassarisaaanik kom-  
munimut naafferartumik suli akilersuisoq, naak Naammagittaalliuuteqartarfik aala-  
jangeereeraluertoq.

Taanna pillugu oqaatigaara Naammagittaalliuuteqartarfiup aalajangiinera malin-  
neqanngippat tamanna Isumaginninnermi Naammagittaalliuuteqartarfiup nakkutil-  
liinermi oqartussaasumut, sulami matumanii Ilaqtariinnermut Pisortaqrarfimmum,  
nalunaarutigisariaqaraa."

Allakkakka 29. september 2004-meersut akeqqullugit Isumaginninnermi Naammagittaalliuuteqartarfik 24. februar 2005-imi nukingisaarpala. Isumaginninnermi Naammagittaalliuuteqartarfimmum tamatumunnga peqati-  
gitillugu imatut allappunga:

"Aammattaaq Isumaginninnermi Naammagittaalliuuteqartarfik qinnuigaara Naammagittaalliuuteqartarfiup aalajangiinera K Kommunip malissimagunangik-  
kaa Naammagittaalliuuteqartarfiup paasigamiuk qanoq iliuuseqarsimanini nalunaar-  
utigeqqullugu."

Allakkakka 29. september 2004-meersut aamma 24. februar 2005-  
imeersut akeqqullugit Isumaginninnermi Naammagittaalliuuteqartarfik 6.  
april 2005-imi nukingisaqqippala.

Isumaginninnermi Naammagittaalliuuteqartarfiup allagai 11. april 2005-  
imi ullulerneqarsimasut 6. juni 2005-imi tiguakka. Allakanit makku erser-  
put:

"Isumaginninnermi Naammagittaalliuuteqartarfiup Ombudsmandip allagaqaatai tigusimalerpai, ataani pineqartup A-p Naammagittaalliuuteqartarfimmik naamma-gittaalliuuteqarnerata sumut killinneranut tunngasut.

Isumaginninnermi Naammagittaalliuuteqartarfiup aprilip 16-ini 2004 suliassaq aalajangiiffigaa. Imaalluarsinnaavoq A-p aalajangiineq tigusimanngikkaa, kisianni Naammagittaalliuuteqartarfiup aalajangiineq allakkerisarfikkut utertinneqarsimanera tigusimanngilaa, naak nalinginnaasumik taama pisoqartalaruertoq najugarisaq qimassimagaanni allamilluuuniit pisoqarsimappat.

Naammagittaalliuuteqartarfiup aalajangerneri nalinginnaasumik sap.ak. 1-3 ataatsimiinnerup kingorna nassiunneqartalaruarput, siulersuisup aalajangernerit atsiortinnagit misissortarmagit, nutserneqarneri utaqeqqaarneqartarmata il.il., piffis-sarli sivisunerusinnaasarpooq. Imaariataarsinnaavorli aalajangerneq A-lu Ombuds-mandimut allagai imminnut paarlasmimasut.

Suliassami erserpoq A kommunip piumasaqaataanut suli akilersuisoq, naak kom-munip marts 2004-mi piumasaqaatertik tunuartikkaluaraat, naallu Naammagittaalliuuteqartarfiup aalajangernera pisimagaluaq kommunimullu nalunaarutigineqarsimalluni. A-p aalajangernerup imarisaa aammattaaq nalorninartoqartinguatsiarpa. A Naammagittaalliorfimmum saaffiginninnissaminut tikilluaqqusaavoq, aalaja-ngernerup nassuiarnissa kissaatiguniuk.

Ajornarsimavoq suliassap toqqorsivimmi nassaarinissaa, taamattumik suliassaq pissusiatut suliareqqinniarsarisimavarput qarasaasiatut ikkussorneqarsimasut al-laqqinnerisigut allakkallu nuutinnerisigut; Naammagittaalliorfifiup ajuusaarutigaa suliassaq pissusiviatus tamakkivillugu suliareqqinniarnera ajornavissimammata.

Suliassap allagaatai suliareqqitat ilanngunneqarput."

Nukingisaarutiga 6. april 2005-imeersoq akeqqullugu Isumaginninnermi Naammagittaalliuuteqartarfik 14. juni 2005-imi nukingisaarpa. Isumaginninnermi Naammagittaalliuuteqartarfimmum tamatumunnga peqatigitil-lugu imatut allappunga:

"Inatsisartut Ombudsmandiat pillugu Inatsisartut inatsisaanni § 7, imm. 1 Isumaginninnermi Naammagittaalliuuteqartarfimmum malugeqquara, tassanngami erser-mat oqartussaasut "pisussaapput Ombudsmandi paassisutissanik nalunaarfigissallugu aammalu uppermarsaatissanik allattaavinnillu atorfini naapertorlugu piumasarisanik saqqummiussiffigissallugu".

Qinnutigisakka Isumaginninnermi Naammagittaalliuuteqartarfiup akinngiinnar-pagit sulinera Isumaginninnermi Naammagittaalliuuteqartarfik eqqarsaatigalugu ingerlassinnaanngilara, tamannalu Isumaginninnermi Naammagittaalliuuteqartarfiup tungaanit allaffissornikkut aqutsinermi annertuumik sumiginnaanerussaaq, Inatsisartunut nalunaarutigissallugu pisussaaffigisassara.

Taamaattumik malugeqquara Isumaginninnermi Naammagittaalliuuteqartarfik akissuteqanngippat Isumaginninnermi Naammagittaalliuuteqartarfik eqqarsaatigalugu suliannik ingerlatsisinnaannginnera Inatsisartunut Naalakersuisunullu nalunaarutigissallugu isumaliutersuutiginiariga, takuuq Inatsisartut Ombudsmandiat pil-lugu Inatsisartut inatsisaanni § 10, imm. 1.

Taamaattumik suliap sularineqarnerata sapinngisamik annertunerpaamik nuki-niunneqarnissa qinnutigaara.

Malugeqquara Naammagittaalliuuteqartarfimmil 1. april 2005-imi allakkanik tigu-saqarama, tamatumani Naammagittaalliuuteqartarfiup suliat Naammagittaalliuute-qartarfimmil ingerlasut killiffii nalunaarutigai. Naammagittaalliuuteqartarfiup allak-

kamini qinnutigisakka akissuteqarfiginngilai, A-lluunniit naammagittaalliuutaa eq-qaasimanagu.

Naammagittaalliuuteqartarfiup allagai 11. april 2005-imi ullulerneqarsimasut 6. juni 2005-imi tiguakka. Allakkat taakku Naammagittaalliuuteqartarfiup allagai 6. oktober 2004-mi tigusakka annertutigut assigaat. Taamaattorli imaattoq ilanngun-neqarsimavoq:

”Ajornarsimavoq suliassap toqqorsivimmi nassaarinissaa, taamaattumik sulias-saq piissusatut suliareqqinniarsarisimavarput qarasaasiamut ikkussorneqarsimasut allaqqinnerisigut allakkallu nuutinnerisigut; Naammagittaalliorqartarfiup ajuusaaruti-gaa suliassaq piissusiviatut tamakkivillugu suliareqqinniarnera ajornavissimamat.

Suliassap allagaatai suliareqqitat ilanngunneqarput.”

Tamanna imatut paasivara suliami iliuuserineqartut pillugit allattuiffik Isumagin-ninnermi Naammagittaalliuuteqartarfiup suliarisinnaasimanngikkaa, taamatuttaarlu suliami iliuuserineqartut naammagittaalliuuteqartumut qanoq annertutigisumik ilisi-matitsissutigineqartarsimanerat Naammagittaalliuuteqartarfiup nassuiarsinnaan-gikkaa.

Taamaattumik Naammagittaalliuuteqartarfik nassuaateqarnissamut taarsiullugu qinnuigaara suliani iliuuserineqartut naammagittaalliuuteqartunut ilisimatitsissutigi-neqartarnerat nalinginnaasumik ileqqunersoq nalunaarutigeqquallugu.

Aammattaaq oqaatigaara Naammagittaalliuuteqartarfiup aalajangiinera K Kom-unip malissimagunangikkaa Naammagittaalliuuteqartarfiup paasigamiuk Isumaginninnermi Naammagittaalliuuteqartarfiup qanoq iliuuseqarsimaneranik nassui-aqqusinera Naammagittaalliuuteqartarfiup suli akismanngikkaa.

Taamaattumik Naammagittaalliuuteqartarfik qinnuigeqqippa qinnutigisakka akeqqullugit. Malugeqqullugu oqaatigeqqippa qinnutigisakka Isumaginninnermi Naammagittaalliuuteqartarfiup akinngiinnarpagit tamanna Naammagittaalliuuteqartarfiup tungaanit aqtsinikkut sumiginnaanertut annertuutut isigniariga, Inatsisartu-nut nalunaarutigissallugu pisussaaffigisassara, aamma tak. allakkanni 6. april 2005-imeersuni oqaatigineqartut.

Taamaattumik Naammagittaalliuuteqartarfik qinnuigaara suliap suliarineqarnera sapinngisamik annertunerpaamik nukingiuteqquallugu.

Naammagittaalliuuteqartoq allakkat ukua assilinerannik nassinneqarnermigut qu-lani taaneqartut pillugit ilisimatinneqarpoq.”

Isumaginninnermi Naammagittaalliuuteqartarfiup akissutaanik tigusa-qarsimanginna Inatsisartut Inatsisit Atortinneqarnerannut Ataatsimiiti-taliaannut aamma Kalaallit Nunaanni Naalakkersuisunut 27. juli 2005-imi nalunaarutigaara. Tamatumunnga peqatigitillugu nalunaarutigaara sulias-saq Inatsisartut uannut suliareqquaat suliarisinnaanngikiga.

Isumaginninnermi Naammagittaalliuuteqartarfiup allagai 8. august 2005-imi tiguakka. Allakkanit taakkunannga makku erserput:

”Isumaginninnermi Naammagittaalliuuteqartarfiup Ombudsmandip allagai 14. juni 2005-imeersut tiguai, taakkunani suliassami sullissinerni ingerlanneqartuni maalaaruteqartarfiup suleriaasia pillugu ilisimatitsissutit piumaneqarlutik.

Ammattaaq naammagittaalliuuteqartarfik qinnuigineqarpoq nassuaaqquallugu suliassami qulaani taaneqartumi kommunip pineqartoq naammagittaalliuuteqartarfiup aalajangiineranik maleruaasimannginneroq.

Naammagittaalliuutit ilisimatisissutigineqartarnerannut atatillugu Isumaginninnermi Naammagittaalliuuteqartarfiup suleriaasia eqqarsaatigalugu oqaatigineqarsin-naavoq naammagittaalliuuteqartarfiup naammagittaalliuummik tigusaqaraangami uppernarsaatitut allakkat nassiuutarmagit, taamatullu naammagittaalliuuteqartoq ilisimatinneqartarluni, paasissutissat allat oqartussaaffeqarfimmilu naammagittaalliuuteqarfiusumi pissarsiarineqarsinnaasut. Tamatumma kingornatigut oqartussaaffeqarfifiup naammagittaalliorfigineqartup nukingisaarneqarnissaa pisariaqartinneqarpat naammagittaalliorq tamatuminnga ilisimatinneqartarluni.

Kommunip naammagittaalliuuteqartarfiup aalajangiineranik amigartumik naam-massinninnera eqqarsaatigalugu naammagittaalliuuteqartarfik pineqaatissiinissaminiut periarfissaqanngilaq taamaattumillu qanorluunniit iliirluni kommuni aalajangiinermik maleruaanissaanut pinngitsaalisinnaanagu.

Aammattaaq naammagittaalliuuteqartarfimmilu sulisussat killeqarput, taamaattumillu naammagittaalliuuteqartarfup naammagittaalliuutinik suiliassat tulleriaarlugit suliarisariaqarlugit, oqartussaasutut naammagittaalliuutigineqartup aalajangiinernik maleruaanerata malittarineqarnissaaninngarnit pingarnerutilugu."

Isumaginninnermi Naammagittaalliuuteqartarfimmut tamatumma kingornatigut 6. september 2005-imi imatut allappunga:

"Isumaginninnermi Naammagittaalliuuteqartarfiup allagai 5. august 2005-imeersut tiguakka.

Isumaginninnermi Naammagittaalliuuteqartarfik ilaatigut imatut allappoq:

"Naammagittaalliuuteqartarfiup aalajangiineranik kommunit pitsanngorsaasan-ninginnerannut tunngatillugu, Naammagittaalliuuteqartarfik pineqaatissiinissaminut periarfissaqanngilaq taamaattumillu qanorluunniit iliirluni kommuninut aalajangiinermik pinngitsaalilluni malitsitsiniaasinnaanani.

Aammattaaq Naammagittaalliuuteqartarfimmilu sulisussaqraneq killeqarpoq, taamaattumillu oqartussaasoq naammagittaalliuutigineqartoq aalajangiinernik malin-ninersoq pillugu tamatumma malitseqartinnissaanut sanilliullugu Naammagittaalliuuteqartarfiup naammagittaalliuutit suliarineqarnissaat sallitittarpaa."

Tamanna pillugu oqaatigaara Naammagittaalliuuteqartarfiup naammagittaalliuuteqartarfittut oqartussaasutut inisisimainerata kingunerisaanik Naammagittaalliuuteqartarfiup paasippagu Naammagittaalliuuteqartarfiup aalajangiineri kommunimit malinneqanngitsut, Naammagittaalliuuteqartarfik iliuuseqartariaqarpoq tassunga ilanggullugu kommunimut attaveqarluni suliarlu kommunit nakkutilliisuinut tamanna pisariaqassappat saqqummiullugu.

Aammattaaq pisut naapertorlugit ilitsersuisussaatitaanerup nalinginnaasup kingunerisaanik Naammagittaalliuuteqartarfiup aalajangiinerata malitsinniarneqarnissaanut innuttaasoq qanoq periarfissaqarnersoq pillugu innuttaasoq ilitsersorneqartariaqarpoq.

Isumaginninnermi Naammagittaalliuuteqartarfik qinnuigaara qulaani pineqartut Naammagittaalliuuteqartarfiup iliuuseqarnissaanut pissutissaqartitsilernersut ilisimatisissutigeqqullugu."

Isumaginninnermi Naammagittaalliuuteqartarfik uannut 17. oktober 2005-imi imatut allappoq:

"Inatsisartut Ombudsmandiata suliaq qulaani pineqartoq pillugu allagai Isumaginninnermi Naammagittaalliuuteqartarfiup 7. september 2005-imi tiguai.

Kommuninik Naammagittaalliuuteqartarfiup aalajangiinerik malinninngitsutut Naammagittaalliuuteqartarfiup siunissami qanoq suliariinnittarnissaanik ilisimatin-neqarnissani Inatsisartut Ombudsmandiata allakkani qinnutigaa.

Naammagittaalliuuteqartarfiup Inatsisartut Ombudsmandiat allakkatigut 5. august 2005-imeersutigut siusinnerusukkut ilisimatissimavaa Naammagittaalliuuteqartarfik pineqaatissiissuteqarnissaminut periarfissaqanngitsoq, taamaattumillu kommunip aalajangiinerik malinninissaa sukkulluunniit pinngitsaaliissutigisinnanagu.

Aammattaaq Naammagittaalliuuteqartarfimmut atugassiissutaasut killeqarput, taamaattumillu naammagittaalliuutit pillugit suliat suliariineqarnerat Naammagittaalliuuteqartarfiup sallutippaa, oqartussaasup naammagittaalliuutigineqartup aalajangiinerik malinninneranerut malitseqartitsiviginneq sallutinnagu.

Inatsisartut Ombudsmandiata tamanna pillugu oqaatigaq Naammagittaalliuuteqartarfik oqartussatut quilliunerusut naammagittaalliorfissaasoq, taamaattumillu Naammagittaalliuuteqartarfiup aalajangiinerik kommunip malinninnginnera paa-siguniuk iliuuserisassat pisariaqartut iliuuserinissaannut pisussaaffeqartoq.

Taamatut ilisimasaqalerneq Naammagittaalliuuteqartarfiup soorunalimi isignitsusaarneq ajorpaa, Naammagittaalliuuteqartarfiulli aalajangiinera kommunip malissagaa inassuteqaatigisarlugu. Taamaaliortoqassappat aalajangiinerup malinne-qannginnera Naammagittaalliuuteqartarfiup ilisimasaqarfigissagaq soorunalimi piu-masaqataavoq, tassami Naammagittaalliuuteqartarfiup aalajangiineri komunit malissagaat Naammagittaalliuuteqartarfiup aallaavittut naatsorsuutigisarmagu.

Innuttaasoq aalajangiinerup malinneqannginnera malugeqquniarlugu saaffiginnipat Naammagittaalliuuteqartarfiup aalajangiinerik naammassinninniarluni periarfissat suunerat Naammagittaalliuuteqartarfiup soorunalimi ilitsersuutigissavaa." (Atorfefarfimmi nutsigaavoq)

Isumaginninnermi Naammagittaalliuuteqartarfik allakkannut 7. september 2005-imeersunut akissuteqaqqullugu 19. oktober 2005-imi nukingisaarpala. Isumaginninnermi Naammagittaalliuuteqartarfimmut tamatuma saniatigut imatut allappunga:

"Isumaginninnermi Naammagittaalliuuteqartarfiup allagai 17. oktober 2005-imeersut 18. oktober 2005-imi tiguakka. Isumaginninnermi Naammagittaalliuuteqartarfiup allakkani taakkunani makku oqaatigai:

"Inatsisartut Ombudsmandiata suliami qulaani taaneqartumi allagai Isumaginninnermi Naammagittaalliuuteqartarfiup 7. september 2005-imi tiguai.

Inatsisartut Ombudsmandiat allakkani taakkunani kommuninik Naammagittaalliuuteqartarfiup aalajangiinerik malinninngitsutut Naammagittaalliuuteqartarfiup ilisimasaanik Naammagittaalliuuteqartarfiup siunissami suliariinnittarnissaanik ilisimateqquvoq.

Naammagittaalliuuteqartarfiup Inatsisartut Ombudsmandiat allakkatigut 5. august 2005-imeersukkut siusinnerusukkut nalunaarfisisimavaa Naammagittaalliuuteqartarfik pineqaatissiissaminut periarfissaqanngitsoq, taamaattumillu kommunip aalajangiinerik malinninissaanik qanoluunniit iliorluni pinngitsaaliniansinnaanagu.

Aammattaaq Naammagittaalliuuteqartarfimmu nukissat killeqarput, taamaattumillu naammagittaalliuutit suliat suliariineqarnissaat Naammagittaalliuuteqartar-

fiup sallitillugu, oqartussaasup naammagittaalliuutigineqartup aalajangiinermik malinninneranik nakkutilliineq sallitinnagu.

Inatsisartut Ombudsmandiata tamanna pillugu oqaatigaa Naammagittaalliuuteqartarfik oqartussatut quilliunerusutut naammagittaalliorfissaasoq, taamaattumillu pisariaqartunik iliuuseqarnissaminut pisussaafeqartoq, Naammagittaalliuuteqartarfiup aalajangiineri kommunimit malinneqanngitsut paasineqarpat.

Taamatut paasisaqarneq Naammagittaalliuuteqartarfip soorunalimi imaalia-laannaq soqtigingngitsusaartangilaa, Naammagittaalliuuteqartarfiulli aalajangiinera kommunip malissagaa inassuteqaatigisarlugu. Taamaaliortoqassappat soorunalimi piumasaqaataavoq aalajangiinerup malinneqannginnera Naammagittaalliuuteqartarfip ilisimassagaa, tassami Naammagittaalliuuteqartarfip aallaavittut naatsorsuutigisarmagu Naammagittaalliuuteqartarfip aalajanginera kommunip malissagaa.

Innuttaasoq aalajangiinerup kommunimit malinneqannginnera uparuarniarlugu saaffiginnippat Naammagittaalliuuteqartarfip aalajangiinerata naammassineqarnissaa siunertalarugu perifissat suunerat Naammagittaalliuuteqartarfip soorunalimi ilitsersuutigissavaa." (Atorfefqarfimmi nutsigaavoq)

Isumaginninnermi Naammagittaalliuuteqartarfik uannut 11. april 2005-imi imatut allappoq:

"Suliamit erserpoq A kommunip pisassarisaa nik naafferartumik suli akilersuisoq, naak pisassarisat akilersinniarneqassanngitsut kommuni 2004-mi martsimi aalajangiisimagaluartoq, naallu Naammagittaalliuuteqartarfik kommunimut nalunaarutigineqarsimasumik aalajangiisimagaluartoq. ..." (Atorfefqarfimmi nutsigaavoq)

Tamakku tunngavigalugit Isumaginninnermi Naammagittaalliuuteqartarfik qinnuigeqqippara manna nalunaarutigeqqullugu, tassalu Isumaginninnermi Naammagittaalliuuteqartarfip aalajangiineranik K Kommunip malinnigunanginneranut atatillugu Naammagittaalliuuteqartarfik qanoq iliuuseqalersaarnersoq.

Tamatumunnga peqatigitillugu Naammagittaalliuuteqartarfimmut malugeqqullugu oqaatigaara K Kommunip aalajangiinera 26. november 2002-meersoq Naammagittaalliuuteqartarfip aalajangiinermigut 16. april 2004-meersukkut atorunnaarissimaga."

Isumaginninnermi Naammagittaalliuuteqartarfik allakkannut 19. oktober 2005-imeersunut akissuteqaqqullugu 21. november 2005-imi aamma 21. december 2005-imi nukingisaarpara.

Isumaginninnermi Naammagittaalliuuteqartarfik uannut 5. januar 2006-imi imatut allappoq:

"Isumaginninnermi Naammagittaalliuuteqartarfip suliami A-p naammagittaalliuutanut tunngasumi Naammagittaalliuuteqartarfip aalajangiinerata malinneqarnissaa pillugu K Kommunimut arlaleriarluni saaffiginnittareerluni K Kommunip alлагai 9. december 2005-imi ullulerneqarsimasut tiguai.

Allakkani oqaatigineqarpoq aalajangiinerup malinneqarnissaa K Kommunip massakkut isumaginiaraa. K Kommunip allagaasa assilinerat ilanngullugu nassineqarpoq." (Atorfefqarfimmi nutsigaavoq)

K Kommunip allagaanit 9. december 2005-imi ullulerneqarsimasunit ilanngullugit nassiuunneqartunit makku erserput:

"Naammagittaalliuuteqartarfiup aalajangiinera innersuussutigalugu ajuusaaruti-galugu oqaatigisariaqarpala aalajangiineq K Kommunip manna tikillugu malissi-manngikkaa.

Tamanna paatsoornermik piissuteqarpoq, Naammagittaalliuuteqartarfiup aalaja-ningineri K Kommunip soorunalimi tamatigut malittarmagit.

Taamaattumik 29.335,00 kr.-t A-mut....., ingerlaannaq tunniunneqarnissaat isu-magissavara, aalajangiineq 16. april 2004-meersoq naapertorlugu." (Atorfegar-fimmi nutsigaavoq)

*Tamatuma kingornatigut imaattunik oqaaseqaateqarpunga:*

*"Aallaqqaassiullugu oqaatigaara A-p Isumaginninnermi Naammagittaalliuuteqartarfimmum ulloq suna naammagittaalliorisimanera paasissal-lugu ajornarsimasoq. Suliamilli erserpoq K Kommunip aalajangiinera 26. november 2002-meersoq A-p naammagittaalliuutigisimagaa. Isumaginninnermi Naammagittaalliuuteqartarfimmum naammagittaalliorissamut sa-paatit akunnerisa sisamat piffissaliunneqartarnerat isiginiarlugu A Isuma-ginninnermi Naammagittaalliuuteqartarfimmum 2002-mi decemberip qaammataani, kingusinnerpaamik 24. december 2002-mi, naammagittaalliuuteqarsimasoq tunngaviutippa.*

*1. Piffissaq Isumaginninnermi Naammagittaalliuuteqartarfiup suliamik suliarinninnerminut atugaa.*

*K Kommunip aalajangiinera 26. november 2002-meersoq A-p Isumagin-ninnermi Naammagittaalliuuteqartarfimmum kingusinnerpaamik 2002-mi decemberimi naammagittaalliuutigisimavaa. Isumaginninnermi Naamma-gittaalliuuteqartarfik suliami A-p naammagittaalliuutaanut tunngasumi 16. april 2004-mi aalajangiivoq. Pisortanit ikorsiissutinik utertitassan-ngortillugit ikorsiisoqarnissaanik aalajangiineq pillugu naammagittaalliuut pineqarpoq. Aningaasat 29.335,- kr.-t utertillugit akilerneqarnissaat pineqarpoq.*

*Uanga paasinninnera unaavoq suliaq immikkut ajornartorsiutissarta-qanngitsoq pineqartoq. Tassani aamma ilaavoq 29.335 kr.-t, naammagittaalliorumut pineqartumut annertuutut isigneqarnissaat ilimanartut, utertillugit akilerneqarnissaannik piumasaqaateqarneq pillugu naamma-gittaalliuutip pineqarnera.*

*Suliassat suliarineqartarnerat pillugu inatsit pillugu Namminersorne-rullutik Oqartussat ilitsersuutaanni immikkoortumit 199-imit makku erser-put:*

*"199. Suliassat tamarmik pisortat ingerlatsiviinit suliarineqartut soorunami sa-pinngisamik pisariitsumik, sukkasuumik aningaasartuutaavallanngitsumillu suliari-*

*neqartarnissaannik piumasaqaat pingaartumik atuuppoq suliassanut inuit ataasiakkat imaluunniit namminersorlutik ingerlatsiveqarfiit, suliffeqarfiit, peqatigiiffiit il.il. attuumassuteqarfigisaanni.*

...

*Suliap suliarineqarnissaata sapinngisamik aningaasartuutaavallaartus-sangornagu piareersarneqarnissaanik piumasaqaammi kisimi pineqangilaq suliaktaat ataasiakkaat suliarineqarnissaanni nalilersorneqarnissaat oqartussaasup suut nammineerluni suliassamut atorsinnaanerai, kisiannili aamma pineqarpoq suliap sukkasuumik eqaatsumillu ingerlanneqarnera innuttaasumut pineqartumut aningaasatigut qanoq sunniuteqassanersoq. Suliassani suliaktaat sukkasuumik aalajangiivigineqarnissaat innuttaasumut pineqartumut aningaasatigut annertuumik pingaaruteqartuni tamanna aamma isiginiarneqartariaqarpoq.*

*Kiisalu immikkoortumi 204-mi:*

*"Suliassat suliarineqartarnerat pillugu inatsit suliassat qanoq sivisutigisumik suliarineqartarnissaat pillugu nalinginnaasunik aalajangersagartaqangilaq. Tamatununga ilaatiqut tunuliaqtaavoq suliassat pisortat ingerlatsiviiniit suliarineqartartut assigiinngeqimmaa assigiinngeqisunillu annertussuseqartarlutik, taamaattumik inatsisikkut pisortat ingerlatsiviini qanoq sivisutigisumik suliarineqartarnissaasa aalajangersimasumik maleruagassiorissaat ajornarluinnartussaalluni, tassa eqqartuussivinni ajornarpallaanngitsumik atortinniarneqarsinnaasu-nik."*

*Kisiannili Folketingip Ombudsmandiata oqaaseqaatigisartagai tunngavigalugit nalinginnaasumik ingerlatsinermi ileqqut kusanartut malinniarneqarnissaanni suliassat qanoq sivisutigisumik suliarineqartarnissaat pillugu tunngavigineqarsinnaasunik suliassat suliarineqartarnissaasa aaqqissuunneqarnissaat pillugu maleruagassaqartitsineqarpoq, matuma ataa-ni suliaktaat tunngassuteqartup suliap qanoq sivisutigisumik suliarineqas-sangatinneqarneranik ilisimatinneqartarnissaat pillugu.*

*Ombudsmandip aammattaaq aalajangikkat ilaanni tikkuaavigisarsimavaa suliaktaat sivisuumik aalajangiivigineqaratik uninngatinneqartarnissaat pinaveersaarniarlugu kiisalu puigortoorneqarlutik aalajangiivigineqanganngitoortarnissaat pinaveersaarniarlugu oqartussaasut naammattunik atorsinnaalluartunik suliaktaat utefigineqaqqittarnissaannut allattuiffiliortarnissaat.*

*A-p naammagittaalliuutaa Isumaginninnermi Naammagittaalliuuteqartarfip 2002-mi decemberimi tigusimavaa. Suliam A-p naammagittaalliuutaanut tunngasumi Isumaginninnermi Naammagittaalliuuteqartarfik 16. april 2004-mi aalajangiivoq.*

*Taamaalilluni A-p naammagittaalliuutaa Isumaginninnermi Naammagittaalliuuteqartarfip piffissamik ukioq ataaseq qaammatillu sisamat sin-nerlugit sivisussuseqartumi suliarisimavaa.*

*A-p naammagitaalliuutaanik suliarinninnerup sivitsuloorunneqarnera-nut immikkut pissutissaqarsimanera Isumaginninnermi Naammagittaalliuuteqartarfip erseqqinnerusumik nassuiarsimanngilaa.*

*Naammagittaalliuutip suliamik suliarinninnermik immikkut ittunik iliuuseqarfigineqarnissaanik piumasaqaateqarfunningitsup immikkullu ajornartorsiutissartaqangaanngitsup pineqarnera suliamut naammagittaalliuute-qartumut aningaasaqarnikkut annertuumik sunniuteqartussatut ilimagisariaqartumut ataneqartillugu isiginiarlugu isumaqarpunga piffissap Isuma-ginninnermi Naammagittaalliuuteqartarfip suliamik suliarinninnerminut atorsimasaata sivisussusia isorisarialerujussuusoq.*

## 2. Suliami allagaatit/ullunik iliuuseqarfiusunik allattuiffik.

*Isumaginninnermi Naammagittaalliuuteqartarfik allakkanni 29. september 2004-meersuni qinnuigaara suliami iliuuserineqarsimasut ulluisa al-lattorsimaffiat nassiuteqquillugu, naammagittaallior tup taakku pillugit qanoq annertutigisumik ilisimatinneqartarsimanera nalunaarlugu.*

*Isumaginninnermi Naammagittaalliuuteqartarfik uannut 11. april 2005-imi imatut allappoq:*

*"Ajornarsimavoq suliassap toqqorsivimmi nassaarinissaa, taamaattumik sulias-saq pissusiatut suliareqqinniarsarisimavarput qarasaasiamut ikkussorneqarsimasut allaqqinnerisigut allakkallu nuutinnerisigut. Naammagittaallior tarfiup ajuusaarutiga suliassaq pissusiviitat tamakkivillugu suliareqqinniarnera ajornavissimammat.*

*Suliassap allagaatai suliareqqitat ilanngunneqarput."*

*Isumaginninnermi Naammagittaalliuuteqartarfimmut tamatuma kingor-natigut 14. juni 2005-imi imatut allappunga:*

*"Tamanna imatut paasivara suliami iliuuserineqartut pillugit allattuiffik Isumaginninnermi Naammagittaalliuuteqartarfip suliarisinnaasimangikkaa, taamatut-taaru suliami iliuuserineqartut naammagittaalliuuteqartumut qanoq annertutigisumik ilisimatisssutigineqartarsimanerat Naammagittaalliuuteqartarfip nassuiar-sinnaanngikkaa.*

*Taamaattumik Naammagittaalliuuteqartarfik nassuaateqarnissamut taarsiul-lugu qinnuigaara suliani iliuuserineqartut naammagittaalliuuteqartunut ilisimatis-sutigineqartarnerat nalinginnaasumik ileqqunersoq nalunaarutigeqquillugu."*

*Isumaginninnermi Naammagittaalliuuteqartarfik 5. august 2005-imi imatut allappoq:*

*"Naammagittaalliuutit ilisimatisssutigineqartarnerannut atatillugu Isumagin-ninnermi Naammagittaalliuuteqartarfip suleriaasia eqqarsaatigalugu oqaatigine-qarsinnaavoq naammagittaalliuuteqartarfip naammagittaalliuummiq tigusaqa-raangami upternarsaatitut allakkat nassittarmagit, taamatullu naammagittaalliuuteqartoq ilisimatinneqartarluni, paassisutissat allat ogartussaaffeqarfimmnaammagittaalliuuteqarfiusumi pissarsiarineqarsinnaasut. Tamatuma kingornati-gut oqartussaaffeqarfip naammagittaalliorfigineqartup nukingisaarneqarnissaa*

*pisariaqartinneqarpat naammagittaalliortoq tamatuminnga ilisimatinneqartarlu-ni."*

*Tamatuma kingornatigut tunngaviutippa naammagittaalliutip tigu-neqarnerani oqartussaasumillu naammagittaalliutigineqartumit paasis-sutissanik pissarsiniarnermi tamatumalu kingornatigut nukingisaaruteqar-toqarsimappat ilisimatitsissummik naammagittaalliortumut nassiuussisar-neq Isumaginninnermi Naammagittaalliuiteqartarfiup nalinginnaasumik ileqqorigaa.*

*Suliamili allagaatini pilersinneqaqqissimasuni Isumaginninnermi Naammagittaalliuiteqartarfimmit tigusanni Isumaginninnermi Naammagittaalliuiteqartarfiup A-mut allagaanik Isumaginninnermi Naammagittaalliuiteqartarfiup tigusaqarsimaneranik upernarsaataasunik peqanngilaq. Aamma allakkat Isumaginninnermi Naammagittaalliuiteqartarfiup K Kommunimut nassiuussimasaasa oqaaseqaateqaqqusissutaasut suliamiluunniit allagaatinik nassiusseqqusissutaasut assilinerinik peqanngilaq. Kiisalu Isumaginninnermi Naammagittaalliuiteqartarfiup A-mut ilisimatitsissutitut allagarisimasaanik peqanngilaq.*

*Taamaalilluni Isumaginninnermi Naammagittaalliuiteqartarfik suliami matumanii ilisimatitsissutitut allakanik naammagittaalliortumut nassiuussaqarsimanersoq naliliiffigineqarsinnaanngilaq. Tamanna pitsaanngitsutut isigaara.*

*Aamma suliaq sivitsuloorunneqalermat naammagittaalliortoq tamatuminnga ilisimatinneqarsimanersoq Isumaginninnermi Naammagittaalliuiteqartarfiup paasissutissiissutaani imaluunniit suliamii allagaatit sinnerini takuneqarsinnaanngilaq.*

*Suliassat suliarineqartarnerat pillugu inatsit pillugu Namminersorne-rullutik Oqartussat ilitsersuusiaanni immikkoortunit 206-imut aamma 207-imut makku erserput:*

*"206. Oqartussaaffiup aammattaaq suliassamut tunngassuteqartoq ilisimatittiriaqarpaa suliassaq sivikinnerusumik suliarineqartussaagaluaq immikkut pissuteqartumik pisarnermit sivisunerusumik suliarineqartariaqalerpat.*

*207. Suliamut tunngassuteqartumit allakkat nukingisaarutit suliassallu suliarineqarnerani piffissamik atorneqartumik naleqquttumik tunngavilersukkut inger-laannartumik akineqartariaqarput. Akissuteqaammi ilisimatitsissutigineqartariaqarpoq suliassaq qanoq inissisimanersoq aammalu ajornangippat ilisimatitsissutigineqarluni suliassap aalajangiivigineqarnissaa oqartussaaffiup qaqugu naatsorsuutigineraa."*

*Uanga paasinninnera unaavoq suliap pineqartumut tunngasup suliarineqarnerata sivitsuloorunneqarnera Isumaginninnermi Naammagittaalliuiteqartarfiup A-mut ilisimatitsissutigisimasariaqaraluaraa. Aammat-taaq uanga paasinninnera unaavoq tamatumunnga pissutaasoq Isumaginninnermi Naammagittaalliuiteqartarfiup A-mut ilisimatitsissutigisimasariaqaraluaraa.*

Tamatuma kingornatigut oqaatigaara mappip suliami allagaatinik A-mut tunngasunik imallip Isumaginninnermi Naammagittaalliuuteqartarfip toqqorsivianit tammarsimagunarnera pitsaanngitsorujussuartut isigigiga. Suliap tamarmiulluni ilutsini atillugu pilerseqqinnejqarsinnaasimannginneranik Isumaginninnermi Naammagittaalliuuteqartarfip ajuusaarutiginninnera ilalersinnaavara.

3. Isumaginninnermi Naammagittaalliuuteqartarfip aalajangiineranik K Kommunip malinninnginneranut Isumaginninnermi Naammagittaalliuuteqartarfip qisuariarsimannginnera.

Isumaginninnermi Naammagittaalliuuteqartarfik uannut 5. oktober 2004-mi allappoq suliamit ersertoq A kommunip piumasarisaanik naafferartumik suli akilersuisoq, naak Naammagittaalliuuteqartarfik allatut aalajangiisimagaluartoq.

Tamatuma kingornatigut Isumaginninnermi Naammagittaalliuuteqartarfimmut 5. oktober 2004-mi allappunga tamanna Naammagittaalliuuteqartarfip nakkutilliinermi oqartussaasumut nalunaarutigisimasariaqaraluaraa, tassalu suliami matumani Ilaqutariinnermut Pisortaqarfimmut.

Isumaginninnermi Naammagittaalliuuteqartarfik allakkanni 24. februar 2005-imeersuni qinnuigaara Isumaginninnermi Naammagittaalliuuteqartarfip aalajangiinerata K Kommunimit malinneqannginnera Isumaginninnermi Naammagittaalliuuteqartarfimmi paasineqarmat Naammagittaalliuuteqartarfik qanoq iliorsimanersoq paassisutissiissutigeqqullugu.

Isumaginninnermi Naammagittaalliuuteqartarfik uannut allakkatigut 11. april 2005-imeersutigut allappoq A kommunip piumasarisaanik naafferartumik suli akilersuisoq, naak Naammagittaalliuuteqartarfik allatut aalajangiisimagaluartoq.

Tamatuma kingornatigut Isumaginninnermi Naammagittaalliuuteqartarfik qinnutigisannut 24. februar 2005-imeersumut akissuteqaqqullugu 14. juni 2005-imi nukingisaarpara. Isumaginninnermi Naammagittaalliuuteqartarfik uannut 8. august 2005-imi imatut allappoq:

"Kommunip naammagittaalliuuteqartarfip aalajangiinerani amigartumik naammassinninnera eqqarsaatigalugu naammagittaalliuuteqartarfik pineqaatissiinissaminut periarfissaqanngilaq tamaattumillu qanorluunniit iliorluni kommuni aalajangiinerik maleruaanissaanut pinngitsaalisinnaanagu.

Aammattaaq naammagittaalliuuteqartarfimmi sulisussat killeqarput, taamaattumillu naammagittaalliuuteqartarfip naammagittaalliuutinik suliassat tulleriaarlugit suliarisariaqarlugit, oqartussaasutut naammagittaalliuutigineqartup aalajangiinernik maleruaanerata malittarineqarnissaaninngarnit pingarnerutillugu."

Isumaginninnermi Naammagittaalliuuteqartarfimmut 6. september 2005-imi allappunga Isumaginninnermi Naammagittaalliuuteqartarfip oqartussaasutut qulliunerusutut naammagittaalliorfissatut inisisimanerata manna nassatarigaa, tassalu Naammagittaalliuuteqartarfip aalajangii-

*nera kommunip malinngikkaa paasineqarpat Naammagittaalliuuteqartarfik pisariaqartunik iliuuseqartariaqartoq, matumani kommunip attaveqarfingineqarnera kiisalu tamanna pisariaqarpat suliap kommuninik nakkutilliinermi oqartussaasumut ingerlateqqinnejnarera ilangullugu eqqarsaatigalugit.*

*Naammagittaalliuuteqartarfik uannut 17. oktober 2005-imi imatut al-lappoq:*

*"Taamatut ilisimasaqalerneq Naammagittaalliuuteqartarfip soorunalimi isiginngitsusaarneq ajorpaa, Naammagittaalliuuteqartarfip aalajangiinera kommunip malissagaan inassuteqaatigisarlugu. Taamaaliortoqassappat aalajangiinerup malinneqannginnera Naammagittaalliuuteqartarfip ilisimasaqarfingissagaan soorunalimi piumasagaataavoq, tassami Naammagittaalliuuteqartarfip aalajangiineri kommunit malissagaat Naammagittaalliuuteqartarfip aallaavittut naatsorsuutigisarmagu.*

*Innuttaasoq aalajangiinerup malinneqannginnera malugeqquuniarlugu saaffiginnipat Naammagittaalliuuteqartarfip aalajangiinerinik naammassinninniarluni periarfissat suunerat Naammagittaalliuuteqartarfip soorunalimi ilitsersuutigissaavaa." (Atorfefarfimmi nutsigaavoq)*

*Isumaginninnermi Naammagittaalliuuteqartarfik allakkatigut 19. oktober 2005-imeersutigut qinnuigeqqippara K Kommunip Naammagittaalliuuteqartarfip aalajangiineranik malinninnginneranut atatillugu Isumaginninnermi Naammagittaalliuuteqartarfik qanoq iliuuseqalersaarnersoq paasisstissiissutigeqqullugu.*

*Naammagittaalliuuteqartarfik akissuteqaqqullugu 21. november 2005-imi aamma 21. december 2005-imi nukingisaarpala.*

*K Kommunip Isumaginninnermi Naammagittaalliuuteqartarfimmuit allagaasa 9. december 2005-imeersut assilineri Isumaginninnermi Naammagittaalliuuteqartarfip nassiuppa, allakanillu taakkunanna erserpoq 29.335,- kr.-t A-mut tunniunneqarnissaat K Kommunip isumaginiaraa.*

*Suliap ingerlasimanera pillugu tamatuma kingornatigut imaattunik oqaaseqaateqarpunga:*

*Isumaginninnermi Naammagittaalliuuteqartarfip uannut allagaanit 8. oktober 2004-meersunit erserpoq naak Isumaginninnermi Naammagittaalliuuteqartarfik 16. april 2004-mi allatut aalajangiisimagaluartoq A kommunip piumasarisaanut naafferartumik suli akilersuisoq Isumaginninnermi Naammagittaalliuuteqartarfip ilisimagaa.*

*Suliamit aamma erserpoq K Kommunip, Isumaginninnermi Naammagittaalliuuteqartarfip aalajangiineranut 16. april 2004-meersumut akerliuusik, aningaasanik 29.335,- kr.nik suli akilersuisitsinera pillugu paasisstissiissutigineqartumut atatillugu iliuuseqarnissaq 6. september 2005-imi allagaqarnissama tungaanut pisariaqanngitsutut isigisimagaa.*

*Isumaginninnermi Naammagittaalliuuteqartarfip aalajangiinerata 16. april 2004-meersup K Kommunimit malinneqannginnera Isumaginninnermi Naammagittaalliuuteqartarfip paasigamiuk suliaq qulaajarniar-*

*lugu K Kommunimut ingerlaannartumik attaveqarsimannginnera isorisa-rialerujussuartut isigaara.*

*Aningaasat akilersinneqarsimasut A-mut utertillugit tunniunneqarnisaannik K Kommunip allakkamini 9. december 2005-imeersuni oqaatigisaa isiginiarlugu suliami annertunerusumik iliuuseqaqqissangilanga.*

*A allakkat uku assilinerannik nassinneqarnermigut qulaani taaneqartumik ilisimatinneqarpoq."*